

Banjir Lembah Klang diatasi menjelang 2020

KUALA LUMPUR 25 April - Ancaman banjir di kawasan Lembah Klang akan dapat diatasi menjelang tahun 2020 apabila beberapa projek tebatan banjir utama siap sepenuhnya.

Menteri Sumber Asli dan Alam Sekitar, Datuk Seri Azmi Khalid berkata, antara projek tebatan banjir itu ialah Projek Kolam-kolam Takungan Banjir Batu dan Jinjang serta Program Tebatan Banjir Lembah Sungai Klang.

"Selain itu, kerajaan juga sedang melaksanakan Projek Tebatan Banjir Sungai Kerayong yang meliputi kerja menaik taraf sungai untuk meningkatkan keupayaannya serta kolam takungan banjir berhampiran Flat Seri Seri Johor," katanya.

Beliau berkata demikian ketika mengulung perbahasan Rancangan Malaysia Kesembilan (RMK-9) di Dewan Rakyat hari ini.

Menurutnya, antara faktor yang menyebabkan banjir termasuk pembangunan pesat di kawasan tadahan, pembangunan tidak terancang atau terkawal, pembangunan di dataran sungai dan sistem perparitan setempat yang tidak sempurna.

Azmi memberitahu, kementeriannya juga telah merangka program jangka panjang dalam RMK-9 bagi mengatasi masalah banjir di semua negeri yang merangkumi kawasan Projek Pembangunan Pertanian Bersepadu (IADP).

Sebagai contoh, katanya, kementerian itu telah meluluskan Rancangan Tebatan Banjir Setiu yang merangkumi kawasan Lembaga Kemajuan Terengganu Utara (Ketara).

Katanya, dengan projek tebatan banjir itu, ia akan dapat mengurangkan kejadian banjir, seterusnya meningkatkan aktiviti pertanian di kawasan terbabit.

Dalam pada itu, beliau menjelaskan, semua pembangunan di kawasan tadahan air perlu dirancang dan hanya pembangunan yang tidak mengakibatkan pencemaran dibenarkan.